

جمهورية قلبي

info@darak-egy.com



02 24832669-010 27251915



51 ب شارع النهضة – من امتداد رمسيس – القاهرة.



جميع حقوق الطبع والتوزيع محفوظة للناشر.



للناشر والتوزيع

جمهورية قلبي

اسم المؤلف: شادي أحمد

تصميم الغلاف: أسامة علام

تدقيق لغوي: سارة صلاح

رقم الإيداع: 2021/14341

الترقيم الدولي: 4-66-6634-977-978

الطبعة الأولى: 2021

شادي أحمد

جمهورية قلبي

رواية



إهداء

إلى كل روح معذبة سکنَ جوانبها الحزن من الماضي
والخوف من المستقبل، إلى كل الأحباء الذين لم تشأ
الحياة أن يلتقوا، إلى قلوب أنهكها الفراق وأنهكها
البقاء، فليست كل الاختيارات عادلة..

المقدمة

الملل هو ذلك القاتل الخفي الذي يقتنص أرواحنا ويعذبها دون أن ندرك ما الذي أصابنا، نجد أنفسنا معذبة وحزينة وقاسية، حالات من البكاء الصامت، والتعب والإرهاق دون أن نشعر، لنجد أنفسنا أمام حقيقة واحدة وهي أننا نسعى للخلاص، دون حسابات للمكسب والخسارة، فقط نهايات هو كل ما نريده وما نسعى إليه، الحب في بعض الأوقات لا يكفي، الأوقات السعيدة لا تكون شفيعة لما يدور في أنفسنا المنهكة، لذا لا نجد أمانا سوى الهروب لتلك السكينة والهدوء بعيدًا عن الجميع، بعيدًا حتى عن مخاوفنا وآلامنا، لا نجد في أنفسنا سوى الضياع المريح، رصاصة الرحمة نطلقها على أنفسنا دون أدنى شعور بالخوف أو بلوم النفس، الولادة الجديدة في بعض الأحيان تحتاج إلى نهاية، والنهايات لا تولد سعيدة، لذا يجب أن ننتهي لنعود في أشكال وصور مختلفة، عليها تكون أفضل من صورنا الحالية وخيباتنا المتكررة.

(1)

الملل صديقُ العلاقات المقربِّ، ودون أن ندري نجده يتسلل في انسيابية ليصلح كل شيء أو ليضع حدًّا لهذه المهزلة، أمورٌ كثيرة نعتقد أنها ستمر ولكنها تتشعب وتصبح أكبر مع الوقت، نجد أنفسنا غير قادرين على استيعاب كل ذلك الملل الذي يكبر مع الأيام ليتحول إلى شعور عميق بالألم والخذلان ودرجات متفاوتة من الحيرة في ماهية البقاء في علاقات تؤلمنا وتزعجنا دون سبب، وحتى إن وجدنا السبب فأرواحنا تكون قد ملت بالفعل من الاستمرار في هذه الحلقات المفرغة.

في أحد المقاهي المشهورة تجلس (ملك) تلك الفتاة هادئة الملامح جميلة الطلة، والتي تخطت عامها الثلاثين من فترة ليست بالبعيدة، مع صديقتها (نهى الجريتلي)، ويبدو على ملامح (ملك) الغضب والتوتر وهي تقول:

- أنا زهقت، مابقاش عندي قدرة على الاحتمال، حاولت كل المحاولات الممكنة واللي مش ممكنة، تخيلي دخلت على جروبات البنات وسمعت نصايحهم اللي تخرب الدنيا وعملتها لأني ئيست ومفيش حاجة اتغيرت. كريم مابقاش زي زمان، على طول سرحان ومقريف، ما أقدرش أنكر إن الحياة بقت أصعب عن ساعة ما اتجوزنا بس أنا ذنبي إيه.. أنا زيي زيه ويمكن أكثر، عندي شغل وعندي طفلين باخد بالي منهم

ولكني معاه وبحاول أقرب ليه على قدّ ما الظروف تسمح، عارفة أنا هقولك حاجة يمكن ما حدش يعرفها أنا جالي اكتباب وخليت صديقة دكتورة تكتبلي أدوية وقعدت أستخدمها فترة ولكنها ما عملتش حاجة غير إنها زودت اكتبابي، كان بيحبني وبيموت فيا.. إحنا اتجوزنا عن حب سنتين واتجوزنا وكان كل حاجة مثالية حتى كل صحاي بيحسدوني عليه، قلت يمكن اتحسدنا وماما خدتني لشيخ وعمليّ حجاب ورُحت السيدة زينب تصدقي عمري ما كنت رُحت السيدة زينب قبل كده يا (نهى)! ماما حكّتي إني رُحت وأنا صغيرة بس فعليًا مش فاكرها خالص، أصلًا ماما من السيدة زينب بس نقلت من زمان هي وإخواتها فما أعرفش حاجة عنها، إيه الي أنا بقوله ده! معلش صدعتك.

- لا خالص يا (ملك) ما صدعتنيش خالص بس يمكن مش عارفة أقولك إيه، إنتي تقرييًا عملتي كل حاجة ممكن تتعمل فما أعرفش كلامي هيفيد في إيه، إنتي بتشتكي من زمان وأنا عارفة إنه مفيش حل. كانت أنفاس «الشيخة» المتعاقبة تخرج من فم (نهى) للهواء قبل أن تنظر إلى (ملك) وهي تقول:

- (ملك) ما تتطلقي!

تشرب (ملك) رشفة من العصير قبل أن تصطدم مما قالتها (نهى) وتسعل ونظرت إليها قائلة:

- إنتي مجنونة! (نهى) أنا عايشة في كومباوند آه بس زي ما قولتك أنا أمي من السيدة زينب وأبويا من الأرياف، هما ربنا فتح عليهم آه بس مستحيل يرضوا إني أتطلق إحنا ما عندناش بنات بيتطلقوا.
- إيه التخلف ده يا بنتي يعني إيه ما عندكوش بنات بيتطلقوا، هو

إنتي مش عارفة إحنا سنة كام طيب ماعدتيش على محكمة الأسرة قبل كده وشفتي كام ست وراجل عندها بيتطلقوا.

لم تكمل (نهى) حديثها إلا وكانت (مريم الحسيني) تقترب منهما هادئة كعادتها ومتألقة، في تلك الأثناء طلبت (ملك) من (نهى) إنهاء الحديث حيث أنها لا تريد أن تعلم (مريم) بهذا الموضوع.

أومأت (نهى) برأسها إلى (ملك) ونظرت إلى (مريم) التي رحبت بهم.

- إزيكم يا قطط عاملين إيه؟

- حلوين إنتي عاملة إيه فينك مختفية مابتظهريش خالص في الكافية بقالك فترة؟

- عادي يا قطة كنت بتطلق.

- إيه يا بنتي الكلام اللي بتقوليه ده ليه كده.

- عادي يا (نهى) كفاية كده الواحد مش هيفضل عمره كله يتعامل مع أطفال، شوية هو وشوية مامته والعيال وقرف، قُتلته بص نطلق واتطلقنا.

نظرت (نهى) إلى (ملك) وكأن الكلام يؤكد على كلامها قائلة:

- مش قولتلك يا (ملك).

- يا قطة قُتلها إيه؟ (ملك) إنتي عايزة تطلقني؟ عندي محامي روعة.

- لا عادي يا بنتي طلاق إيه؟ كنا بنتكلم أنا و(ملك) إن الطلاق بقى كتير أوي.

هنا ضحكت (مريم) ضحكة ملفتة قائلة:

- عارفين أنا من كثر الطلاق بفكر أتجوز المحامي اللي طلقني، الواد
حلو وصغير والمكتب بتاعه مايفضاش هتلاقيه بيكسب قد كده.

هنا عقببت (ملك) قائلة:

- ده على أساس إن جوزك كان فقير يعني، يا بنتي ده جوزك مقاول
اسمه معروف في البلد كلها.

- لا يا قلبي، عشان لما نطلق نوفر فلوس الطلاق وبعدين الواد حلو
أوي.

- إنتي إيه مابترحميش ده إنتي لسه متطلقة.

- وهو أنا هقعد يعني، لا يا حبيبتي أنا متطلقة عشان أعيش،
الراجل تشيليه وتحطي بداله واحد على طول.

- بس زياد كان كويس يا (مريم) إنتي اللي ظالمة.

- كويس لنفسه ده ابن أمه، وأنا بصراحة ما أقدرش على الفقع ده
يا (ملك).

- فقع إيه هو في حاجة كنتي بتطلبها بآخرها أصلاً؟

- هو كان بيحيب عشان بدلعه والموضوع خلص، هو فين رامي
يجبلنا حجر شيشة واحد يظبط دماغه بيه بدل الهم ده.

يمر العمر سريعاً لنجد أنفسنا قد كبرنا دون أن ندرى، شعرة بيضاء
ينساب بعدها كثير من الشيب حتى نكف عن رؤية الخطوط الصغيرة
سوى بنظارة القراءة، ثم يصبح كل شيء دون طعم سوى تلك اللحظات
السعيدة التي مرت في حياتنا ونستعيدها من وقت لآخر.

في مكتبه الضخم المليء بالتفاصيل الشخصية من صور الأولاد والأحفاد

على المكتب وبعض الزهريات في أركان المكتب الهادئ القائم في أحد أدوار المستشفى العليا، وأمام مكتبه حائط كبير مليء بشهادات الدكتوراة والزمالات. وقف الدكتور (محمد بهجت) الشهير باسم (بهجت) مطالعاً إياها فهو دائماً يرى أن ذلك الحائط هو الإرث الحقيقي الذي سيرثه لأولاده وأحفاده من بعدهم، ذلك الحائط أهم من تلك المستشفى الكبير وأهم من الثروة التي حققها في حياته، يرى دائماً أن حق ما أنجزه في حياته هو ذلك الحائط بلا شك دخل (كريم) صاحب الأربعين ربيعاً بجسده المتناسق، طويل البنية ذو شعر أسود داكن مصفف للوراء في نظام وإتقان، تماماً مثل شخصيته، يرتدي نظارات طبية طوال تواجده في المستشفى، ليجد والده واقفاً أمام الحائط كعادته عندما يكون في حاجة للتفكير في أمر ما، تنهد ليلفت نظر والده إليه قائلاً:

- إيه يا دكتور في إيه؟

- لا يا حبيبي أنا مناديلك في مكتبي عشان عايز ابني، مش عايز دكتور كريم وإن كان اللي جابك هنا أصلاً الشغل.

- في إيه يا بابا أوْمري؟

- بص يا حبيبي عارف إحنا شغلتنا إيه؟

- إحنا دكاترة طبغاً ولا إيه؟

- عارف بقى المستشفى دي عليها اسم مين؟

- اسمك، دكتور محمد بهجت.

- صح كل اللي قلته صح وإننت ابني الكبير ونائب المدير الفعلي بعيداً عن الدكاترة اللي أقدم منك بس إنت اللي هتشيل المستشفى دي بعد عمر الله أعلم قريب ولا بعيد، أخوك سافر أمريكا وعايز يكمل

هناك وأخواتك البنات واحدة متجوزة ومعانا هنا والثانية لسه بتدرس تسويق.

- أنا عارف ده كله يا بابا في إيه قلقنتي؟

- لا أنا اللي قلقان لأن بقالك فترة كبيرة مش عاجبني بس إنت عارف إني مابحبش أتكلم في حاجة تخصصكوا ولا بحب أقرب لتفاصيل حياتكم وده أنا مربيكم عليه من زمان.

- طيب وإيه اللي حصل؟

- من كام يوم شفت فيديو العملية اللي كنت بتعملها للمريضة اللي عندها قطع في إيديها ولاحظت إنك مكنتش طبيعي، مكنتش في تركيزك يا دكتور.

- أنا آسف بس يمكن مكنتش نايم كويس.

- واحنا من إمتى بنام يا كريم، ده عذر مش مقبول خالص، بس أنا قُلتك إني مش جايبك عشان الشغل، كريم إنت في حاجة شاغلة بالك واحنا ساكنين في نفس البيت، آه بس أنا ما أعرفش كل حاجة، هي (ملك) كويسة؟

- آه يا بابا كل حاجة تمام.

هنا فتح دكتور (بهجت) درج مكتبه وأشار إلى (كريم) ليغلق الباب حيث أخرج علبه سجائره وأشعل إحدى السجائر، وبعد أن سحب نفسًا عميقًا منها أخرجه في الهواء ثم قال:

- بُص لو في بينك وبين (ملك) حاجة حاول تحلها بدري، الأمور لما بتطوّل بتمسّخ وبتلاقي نفسك بتخسر أسرع بكتير عما تتخيل، إنك تبني بياخد وقت طويل لكن إنك تهدد بيحصل في ثواني بلاش تهدد اللي بينك

وبين (ملك)، إنت لسه صغير و(ملك) بنت ناس وبتحبك وماشفناش
منها حاجة وحشة وأفتكر إنك بتحبها.

أخذ نفسًا من سيجارته مرة أخرى مستكملًا كلامه:

- بص يا كريم أنا ماكنتش هوصل للي وصلت ليه لو أنا مش
مرتاح في بيتي ومرتاح مع أمك.

- إنت مرتاح مع أمي بجد يا حاج؟ أمال العرفي إيه نظامه؟

- ولد عيب، بص يا ابني أحبها وأشيها على راسي حاجة وكوني راجل
حاجة تانية، كون ليا أخطاء حاجة وكون إني عمري ما قصرت معاها
ولا معاكوا ولا في شغلي حاجة تانية، وزى ما قولتلك أمك كانت السبب،
لولاها ما كنت هبقى صاحب كشك سجائر حتى.

- أديك قلتها بنات اليومين دول.

- البنات على طول متشيكة وحلوة وكل حاجة أنا وافقت عليها
علشان أهلها ولاد بلد، ركز علشان ماتخسرش كل حاجة، يلا روح شوف
شغلك.

- إيه ده بتطردني يا حاج!

- دكتور محمد يا حيوان.. دكتور محمد.

- ماشي يا حاج هقوم أنا أشوف شغلي.

انطلق (كريم) متجهًا إلى الباب، وقبل أن يصل إلى خارج المكتب
ناداه والده:

- أنا عارف إني لازم أخسر معاكم إنت وإخواتك، خُد إجازة أسبوع
وسيب العيال لأمك واطلع إنت و(ملك) شاليه الجونة غير جو.

- بس....

- مفيش بس، اسمع الكلام قبل ما أسحب الإجازة يا دكتور.

- ربنا يخليك لينا يا حاج.

- دكتور محمد يا حيوان.

لا تعلم (ملك) بالفعل متى بدأت العلاقة بينها وبين (كريم) بالفتور، لا تتذكر بالفعل متى وفي أي وقت لم تعد لمسة يده كسابق عهدها، ولكنها تتذكر بوضوح ذلك اليوم الذي اقترب منها وهو يحمل من بين يديها ابنتهما الثانية قائلاً: «حمد الله على السلامة يا (ملك)»، كانت هذه المرة الأولى التي يناديها باسمها وهما وحيدان، دائماً ما كان يخاطبها يا حبيبتي، يا قلبي، يا عمري ولكنه في ذلك اليوم توقف عن مخاطبتها بتلك الألقاب والنساء يشعرون بتلك التفاصيل البسيطة مهما كانت صغيرة وغير ظاهرة، كانت تلك اللحظة بالنسبة لها مرحلة جديدة... مرحلة أم الأولاد، (كريم) دائماً في المستشفى وقليل من الوقت مع أصدقائه، ولكنه في المنزل دائماً ما يكون منفصلاً عن كل شيء يقلب في هاتفه أو يقرأ بعض الأوقات، ولكن صمته أصبح هو الغالب.

توقعت (ملك) أنه قد يكون على علاقة بأخرى فوالده دكتور (محمد بهجت) له تاريخ كبير في ذلك المجال، ولكنها، وبعد بعض المراقبة اكتشفت أنه لا شيء سوى أنه يمر مرحلة غريبة، لا شيء سوى عمله فقط، أشفقت عليه بعض الوقت ولكنها كحال أي امرأة تريد أن تستمع إلى ونيس وصديق وزوج.

تراقب (ملك) الطريق والجبال في طريقهم في إلى الجونة وتستمع إلى كلمات تامر عاشور «أنا كلمة أحب أقولها في أي وقت أنسى اللي